

續修故城縣志卷之八

列女

列女門前志首載鉤弋夫人殊屬牽引東
武垣城爲河間縣境已詳辨古蹟中今刪
之有明一代節烈婦前志合記僅十八條
何其簡也豈當年有司不詳求歟抑詳求
而事必核實甄錄故無多歟入 本朝亦
僅二十餘條茲備錄之此次修志謹遵條
款凡節烈孝婦貞孝女雖僻壤窮鄉貧寒

苦節必爲表揚以闡幽光計得百數十條
俱蒙 憲恩特請 旌表誠小邑褻耀

之幸遇也旣發刊仍留空白紙格以俟續
搜隨時補入

劉若蘭 鄉民劉鉞女舉人志道族孫也嘗納
采某氏某避地遠去十餘年不相聞鉞亦貧
富室顧慕若蘭姿色欲納聘若蘭欲覓死母
奔救得免開諭百端終不聽託浴自縊

盛氏 生員孫惠妻志不再適奉詔旌表曰貞

節

扈氏 鄭昕妻十六歲守節志堅操潔撫孤謙
亨成立娶妻李氏謙亨病故李氏孝養扈氏
誓不他適奉詔建坊旌表曰姑婦雙節各優
免地一頃

秘氏 李宇妻孝事衰姑撫幼成立志節堅苦
趙氏 李恩妻甘心守貞六十七年備嘗辛苦
九十八歲卒

門氏 監生李爾馨妻堅志撫育繼嗣勵節比

于冰葉御史劉扁其門

丁氏 劉九思妻夫故年二十五歲遺孤甫四
週紡織度日及子殤砥節彌堅孝事翁姑始
終如一奉詔旌表

任氏 石翼妻夫故年二十四歲誓志堅操撫
孤成立衣食頻缺厲節益堅年幾七十完節
而終詔旌其門

趙氏 生員周喬妻夫亡年十六歲誓志守節
無子備嘗艱苦竟以憂憤成疾卒邑大夫扁

其門

陳氏 萬化行妻夫故年二十二歲撫養孤子
撐持家業節婦中之最難最苦者邑侯扁其
門曰白首丹心

王氏 沈洲妻夫亡年二十二歲茹冰嚼蘖保
業訓子邑侯給扁旌之九十五歲卒

劉氏 刁可法妻夫故年二十二歲攜幼子事孀
姑家道零丁節操堅勁顏邑侯旌其門曰貞
節

王氏 尹大政妻嫁甫期年夫卒年方十六誓
不他適孝事孀姑蓋守志之最苦者

王氏 光祿監事張克昌妻孝姑撫幼貞節可
嘉張邑侯給扁嘉獎

黃氏 刁可嘉妻撫養幼子艱苦備嘗闕院王
給扁旌之

何氏 李緒妻夫故年二十五歲遺二子苦撫
成立長自立娶魯氏無子仲自茂娶某氏生
子貞甫週歲夫婦雙亡自立亦故魯年三十

二歲何謂魯曰吾命苦當守汝宜他適魯泣
對曰上有孀姑下有孤雛死固不可去尤不
義遂誓與姑同守志操堅潔盡孝盡慈後貞
入邑庠皆兩氏成就何年九十六歲魯年七
十九歲相繼病卒郭邑侯扁其門曰和熊雙
節

張氏 生員張文蔚女知縣郝中桂之子允炤
妻幽閒貞靜孝事翁姑戊寅兵變匿土穴中
被發堅持不從遂遇害

翟氏 生員祕養邃妻辛巳兵變迫脅不允驅
之從行投井死

國朝

王氏 武生蘇蒸黎妻順治七年土寇犯境至
董學村氏爲所獲脅之以威氏厲聲曰吾頭
可斷身不可污罵不絕口賊怒支解之

王氏 節孝王氏姪女劉清漣元配也性至孝
躬自紡織以佐涸漣孝事翁姑三十餘年始
終無間姑安氏病危籲天願以身代會遭兵

變家人咸奔匿氏泣然曰姑在床褥不容爲
自全計甯冒白刃死無貽終天恨也兵至欲
加害具訴以實義而釋之姑歿哀毀骨立啼
久竟至失明里人服其孝義撫二子楨梅和
熊晝荻恩勤備至後以梅貴贈淑人順治八
年卒卒之曰邑高士沈嘉爲文誄之蓋盡紀
其實云

韓氏 夏鳳洲妻夫故年十九子女俱無堅持
節操直指使者兩旌其門順治十年終時年

七十二歲

王氏 劉維忠妻貢士儀祖母夫故年二十一
遺孤甫四歲家道貧寒紡績孝事翁姑有欲
奪其志者堅拒乃息撫幼事親各盡其道年
九十餘卒邑高士沈嘉爲立生傳

馬氏 夏鳳翥妻夫亡年二十二遺女甫週歲
長亦逝氏苦守堅貞貧不易志且家法最嚴
三尺之童不令入室按院兩次旌獎享年七
十有五于順治十四年疾卒

喬氏 儒士王經妻夫亡氏年十九遺子未及
週歲翁姑憐其年幼欲令他適氏以死自誓
撫孤維鼎底于成立食餽邑庠年六十一歲
疾篤泣謂姑曰婦苦節四十餘年已無遺慮
第姑年已八旬未能奉事餘年此吾大憾言
訖而卒時人謂之孝義節婦

崔氏 儒士孫維泰妻生員遵之母夫亡遺孤
方四歲家貧歲歉艱苦萬狀矢志靡他撫子
成立年幾七十而卒士民公舉吳邑侯扁其

門曰媿美柏舟

張氏 蘇允恭妻年二十八歲夫亡食貧守志
紡績奉姑撫孤成立備嘗辛苦年七十而卒

翟氏 秘允信妻生員濬之母夫故家貧守志
不移孝事翁姑教子成立寡居四十餘年志
節最爲艱苦

劉氏 生員秘丕籙妻年十九夫故以首觸壁
幾死者數卒乃曰吾夫素孝友不可無後遂
謀于姑袁氏叔丕笈求族人子立嗣擇期葬

夫葬畢使子就傅居數月復語姑曰此子可以繼後吾事畢矣將隨吾夫於地下遂不食姑泣諭之徐曰姑孀居二十年所以不卽死者將親撫吾夫與叔而俟其成立也今幸有姑與叔在吾尙何憂自是不復語八日卒

張氏 年二十九夫亡家計貧窘撫子成立備嘗辛苦壽登八旬孫男文蔚登科蓋苦節之報也

邢氏 李承啟妻年二十九夫故氏誓志守節

有叔唆姑逼之改適氏剪髮持刀向姑誓死
子庭蘭喊罵以死拒娶者氏始安苦志養姑
姑病瘕侍湯藥益勤慎三年卒盡哀盡禮備
嘗辛苦教子訓孫迄於成立享年八旬康熙
十五年壽終

蔡氏 生員王汝勵妻也端莊貞敬孀于王氏
者十餘年生兩男一女不幸夫罹劇疾執手
與訣曰吾病且死堂上公姑膝下幼稚汝善
視之婦歔歔不能語已而指天誓曰君病革

矣無容慮及後事卽有不諱我何生爲夫歿
氏晝夜號泣勺水不入口者凡七日乃曰夫
死義當殉誓不作未亡人遂仰藥卒闔邑紳
衿公請 憲臺額其門曰烈性靡他

張氏秘氏 張氏宋家普妻普故氏年二十六

歲矢志守義內外無間言秘氏子餘慶婦也
慶死氏甫二十一歲與姑共勵節操始終不
渝張以婦少而寡慈婦如兒秘亦孝姑猶母
廵撫于公督學李公等扁曰荻影霜清邑侯

沈公扁曰松柏雙貞

賈氏 監生周成章妻大司馬衛陽公元孫婦
鄉賢文學若水公長女年十六適周事姑敬
夫卽有賢名至年二十八歲成章故氏仰事
兩姑孝養備至俯育遺孤慈訓兼施睦嫺任
恤樂善不倦孤兒麟徵成立由庠生入貢遵
承祖訓光大家聲皆氏教養之功也通邑士
民服其才敬其操咸以女中丈夫稱之羣以
節孝公請學憲周公起渭具題奉